

元 日

[宋]王安石

爆竹声中一岁除，春风送暖
入屠苏。千门万户曈曈日，总把
新桃换旧符。



清 明

[唐]杜 牧

清明时节雨纷纷，路上行人
欲断魂。借问酒家何处有，牧童
遥指杏花村。



相思

[唐]王 维

红豆生南国，春来发几枝？

愿君多采撷，此物最相思。



登鶴雀樓

[唐]王之渙

白日依山盡，黃河入海流。

欲窮千里目，更上一層樓。



九月九日忆山东兄弟

[唐]王 维

独在异乡为异客，每逢佳节倍
思亲。遥知兄弟登高处，遍插茱
萸少一人。



芙蓉楼送辛渐

[唐]王昌龄

寒雨连江夜入吴，平明送客
楚山孤。洛阳亲友如相问，一片
冰心在玉壶。



江 南

汉乐府

江南可采莲，莲叶何田田！鱼
戏莲叶间：鱼戏莲叶东，鱼戏莲叶
西，鱼戏莲叶南，鱼戏莲叶北。



卜算子

[宋]李之仪

我住长江头，君住长江尾。

日日思君不见君，共饮长江水。

此水几时休，此恨何时已。只愿

君心似我心，定不负相思意。



明日歌

[明]钱鹤滩

明日复明日，明日何其多！
我生待明日，万事成蹉跎。世人
苦被明日累，春去秋来老将至。
朝看水东流，暮看日西坠。百年
明日能几何？请君听我明日歌。



水调歌头

[宋]苏轼

明月几时有？把酒问青天。
不知天上宫阙，今夕是何年。我
欲乘风归去，又恐琼楼玉宇，高
处不胜寒。起舞弄清影，何似在
人间。转朱阁，低绮户，照无
眠。不应有恨，何事长向别时圆？
人有悲欢离合，月有阴晴圆缺，
此事古难全。但愿人长久，千里
共婵娟。

